

唐代盛時與西南鄰國之疆界

嚴耕望

此篇所謂國疆，專就唐代正州領域而言。唐代盛時與西南諸鄰國之分界較為明顯，前人諸圖差誤已不大，此篇據實證，具體言之，期能更見正確。

按唐代最西北正縣爲輪臺（今廂化、烏魯木齊之北），縣西二百八十里清海軍（約今達連湖 $E85^{\circ}30' \cdot N44^{\circ}25'$ ）蓋爲唐疆之極邊。由此東南至天山縣（約今托克遜或稍東）西南七十里，以隘谷（今蘇巴什山溝）與屬國焉耆分界。又東南，以荒過山爲界，在西州（今吐魯番東約 $E89^{\circ}38' \cdot N42^{\circ}50'$ ）南三百五十里。又東南經白龍堆、玉門、陽關之西至沙州西南，折東走，沙州南三百里南口烽（今當金山口）、瓜州南二百五十里大雪山（今山）、肅州南二百里祁連山北麓（主峯北五十里）、甘州南二百餘里祁連山爲唐之國界；其南先爲吐谷渾境，後爲吐蕃國境。自西州南界至甘州南界，爲高山阻隔，界線最爲穩定，大體亦今甘肅、青海省界，而稍有出入。

甘州之南，國界走於黃河槽型地帶，地勢平易，唐蕃互相進退。唐最盛時，據青海湖，於湖心龍珠島置神威軍爲極邊。又東南以大積石山脈與邛崃山脈北段爲界。唐置疊州（約 $E103^{\circ} \cdot N34^{\circ}$ 地區）、松州（今松潘）、潘州（約今興中縣）、洪州（在索磨川）爲邊州。又南奉州（今雜谷腦稍西）南八十里、維州（今理縣）南一百六十里、灌口鎮西南百里（大面山）、蜀州（今崇慶）西八十里，皆接吐蕃界，即邛崃山脈之脊背也。又西南以靈關（ $E102^{\circ}50' \cdot N30^{\circ}17'$ ）、野城（約今懋功）間山脈爲界。又南，以大渡河爲界。又南唐境止於曲羅（約今瀘寧）、昆明縣（今鹽源）之西，置昆明軍。其西皆吐蕃境。

又南，唐境西抵洱海，東南斜趨，略循哀牢山脈至交州（今河內）、愛州、驩州（今宜安）西境，國界蓋在 $E105^{\circ}$ 稍西之山脊，其西皆南詔境。

又南，驩州與文單國（扶南國，今永珍）分界約在 $E104^{\circ}$ 地帶。驩州西南，折東，循橫山至海濱，約 $N18^{\circ}$ ，與環王國（林邑國，今洞海 $E106^{\circ}35' \cdot N17^{\circ}27'$ ）接境，爲唐代南疆之極邊。

1989年2月9日

唐代盛時，最西直接領轄之疆域至天山南北。山北庭州（今孚遠縣 $E89^{\circ}5' \cdot N44^{\circ}$ 北二十里護堡子北之破城）西境置輪臺縣，在州西四百二十里，約在今廂化（烏魯木齊 $E87^{\circ}35' \cdot N43^{\circ}45'$ ）稍北阜康、乾德地區。縣西二百八十里，置清海軍；蓋今達連湖（ $E85^{\circ}30' \cdot N44^{\circ}25'$ ）唐有清海之名，爲唐代西疆之極邊。¹ 山南西州（今魯克沁西北、阿斯塔拉之南， $E89^{\circ}36' - 40' \cdot N42^{\circ}50'$ ）西境置天山縣，在州西一百五十里，以西

阻天山受名，約在今托克遜（E88°35'·N42°48'）或其東二十里之大墩子（E88°45'·N42°50'）。縣西南七十里入隘谷，爲通焉耆國之孔道，約在天山山脈向東南分出最大支脈今名庫魯克山脈（Kuluk Tagh）中之蘇巴什山溝（E88°30'·N42°30'）、阿海泉山口（E88°30'·N42°25'），兩崖壁立，人行其間，如一線天，爲古代車師焉耆間之天然關隘。² 唐之國界，蓋由清海軍之西，南跨天山，循今庫魯克山脈東南至此隘谷，爲唐代正州之西界也。

由此循山而東，有荒過山在西州南三百五十里，約今庫魯克山脈中，蓋卽州之南界，過山至吐蕃千餘里。³

由荒過山東南至沙州（今燉煌縣）西壽昌縣西境玉門關、陽關之西。縣在州西南一百五十里，玉門關在縣西北一百一十八里，陽關在縣西六十里。關西白龍堆蓋卽州界；其西入屬國境。⁴

由沙州之西折東南至沙州南三百里或三百五十里南口烽，爲唐與吐谷渾界，蓋亦唐與吐蕃國界。南口卽今當金山口（約 N39°20'·E94°15'-25'），地當阿爾金山脈、祁連山脈連接處，西東兩峯海拔三八〇一公尺、四三〇二公尺，爲天然境界，今日猶爲甘肅、青海兩省分界嶺。⁵ 又東，國界在瓜州（約今瑣陽城，E96°15'·N40°15'）南約二百三四十里，與吐谷渾接境，亦唐與吐蕃國境，度其界約在 N39° 線大雪山脈中。《元和志》云，瓜州治所晉昌縣南一百六十里大雪山者，則就山脈北峯今圖海拔五四八

1 《唐代交通圖考》卷二·篇十四·頁 602-605。

2 《圖考》卷二·篇十二·頁 454, 464。阿海泉殆卽《慈恩傳》卷二之阿父師泉，見《圖考》頁 469。

3 《通典》一七四西州，「南至三百五十里荒過山，千餘里至吐蕃。」《寰宇記》一五六西州，「南三百六十里至荒過山，又千餘里至吐蕃。」《通典》「至」當乙在「里」下。《元和志》四〇西州，「南至樓蘭國一千二百里，並沙磧難行。」此蓋唐以前記錄，但可知唐代西州南行，越山脈渡沙磧經羅布泊地區至吐蕃境。

4 《元和志》四〇沙州，壽昌縣東至州一百五十里。玉門故關在縣西北一百一十八里，謂之北道。陽關在縣西六里，以居玉門關之南，故曰陽關，謂之南道。《寰宇記》一五三沙州，縣在州西南一百五十里，陽關在縣西六十里，餘並同。《記》方位爲正，里距蓋亦當從《記》。《寰宇記》又引皇甫謐《郡國記》，「敦煌正西關外有白龍堆。」蓋卽沙州西面境界也。

5 《通典》一七四，沙州「南至故南口烽二百五十里，烽以南吐谷渾界。」《寰宇記》作三百五十里。《元和志》四〇沙州〈八到條〉，「東至瓜州三百里，西至石城鎮一千五百里，西至吐蕃界三百里，北至伊州七百里。」疑「西至吐蕃界」當作「南至」。檢今諸圖，唐沙州南界在當金山口無疑。此道南通吐谷渾、吐蕃境，詳《圖考》卷二·篇十三〈河湟青海地區軍政交通網〉·頁 559。

三公尺之大雪山 ($E96^{\circ}28' \cdot N39^{\circ}30'$) 而言，國界則在其南九十里山脈中也，蓋亦與今甘青省界略相當。⁶ 又東，國界在肅州（今酒泉縣）南二百里。又云雪嶺在州南二百五十里，即今海拔五五四七公尺之祁連山峯 ($E98^{\circ}40' \cdot N39^{\circ}10'$)。疑今酒泉縣南之甘青省界由 $E98^{\circ}15' \cdot N39^{\circ}25'$ 東南行又以祁連山峯為界者，即唐蕃國界也。⁷ 又東至甘州（今張掖縣）南境，以州西南二百里、州南二百三十里之祁連山、大雪山為界。此段山脈主峯 ($E100^{\circ}17' \cdot N38^{\circ}18'$) 海拔四八一六公尺，亦今甘肅、青海省界也。⁸

- 6 《通典》一七四瓜州，不書南至。《元和志》四〇瓜州，「南至大雪山二百四十里。」又治所晉昌縣「雪山在縣南一百六十里，積雪夏不消，東南九十里，南連吐谷渾界。」《寰宇記》一五三瓜州，「南至大雪山二百三十里。」觀此諸條，《元和志》晉昌縣條書之最明豁，即縣南一百六十里有雪山積雪不消。山東南九十里，則唐與吐谷渾國界。又云南至大雪山二百四十里、二百三十里者，即指國界而言。按縣南一百六十里之雪山即今圖 $E96^{\circ}28' \cdot N39^{\circ}30'$ 之雪山，海拔五四八三公尺。（此據《中共圖集》；ONC 作一六八二一呎，合五一二八公尺。）此為雪山山脈之北峯，其南山脈幅度甚廣，據 ONC，東南山峯多有高出北峯者，國界蓋在山脈中，約在 $N39^{\circ}$ 線上。觀《民國地圖集》，殆即今甘青省界耳。至於瓜州城地望，舊說在今布隆吉城，勞向新說，以為當在今瑣陽城。余前撰《圖考》第二卷·篇十二·涼州西通安西驛道，從勞向新說，但不能全摒布隆吉舊說（頁 436）。今觀《元和志》晉昌縣條，瓜州只在雪山北一百六十里，其在今瑣陽城應無可疑。
- 7 《通典》一七四，肅州「南至吐蕃界二百里。」《寰宇記》一五三肅州，同，又云「南至雪嶺二百五十里。」《元和志》四〇，肅州「南至吐蕃雪嶺二千五百里。」千百顯為百十之譌，而雪嶺似屬吐蕃。檢 ONC-G-8，酒泉縣之南，西有海拔五二三公尺 ($E98^{\circ}15' \cdot N39^{\circ}10'$) 高峯、東有海拔五五三五公尺 ($E98^{\circ}40' \cdot N39^{\circ}10'$) 高峯，方位里距皆與唐宋志書所記略相當。檢《民國地圖集》、《中共地圖集》，東峯即祁連山峯，唐宋志書之雪嶺當指此而言，《中共圖集》海拔五五四七公尺，與 ONC 小異。據上引志書史料，唐蕃國界似在今圖祁連山峯 ($E98^{\circ}40' \cdot N39^{\circ}10'$) 之北五十里。然檢《民國地圖集》，甘青省界在酒泉之南最向北凸出，約在 $E98^{\circ}20' \cdot N39^{\circ}25'$ 處，即上文西峯之北。省界由此點向東南斜行，至祁連山峯，以峯為界，即山峯不專屬青海省境也。疑此段省界即中古以來之南北分界線，亦即唐蕃國界線。古地書略嫌含混，易滋誤會耳。
- 8 《通典》一七四，甘州「南至雪山以南吐谷渾分界，二百三十里。」《寰宇記》一五三，甘州「東〔南〕至大雪山以南吐谷渾分界三〔二？〕百三十里。」《元和志》四〇甘州「南至大雪山二百三十里。」是南至大雪山二百三十里，蓋即吐谷渾分界線。又治所張掖縣，「雪山在縣南一百里，多材木箭竿。」「祁連山在縣西南二百里，張掖、酒泉二界上。」下述山中美水茂草，冬溫夏涼，宜畜牧事甚詳。又云「刪丹縣西至州一百二十里，大斗拔〔拔〕谷在縣南二百里。」則此段祁連山在今張掖縣西南二百里，而在大斗拔谷之西北地區。所謂大雪山界，約在祁連山、大斗拔谷之間地段。大斗拔谷即今扁都口 ($E101^{\circ} \cdot N38^{\circ}$)，詳《圖考》卷二·篇十三河湟青海地區軍鎮交通網、頁 517、520。參稽《民國地圖集》、《中共地圖集》。此段大雪山、祁連山當就今扁都口西北之南古城、黃藏寺地段山脈而言。《中共圖集》，城寺間有高山（約 $N38^{\circ}20' \cdot E100^{\circ}10' - 40'$ ）為甘肅、青海省界，山南置祁連縣。ONC-G-8，此段山脈主峯 ($E100^{\circ}17' \cdot N38^{\circ}18'$) 海拔四八一六公尺。疑即唐宋志書所指之大雪山、祁連山也。是其時國界與今省界亦略同。

自甘州以西，歷肅瓜至沙州，爲兩漢以來之河西走廊，南限祁連山脈，去州常在三百里之譜，諸峯聯珠，海拔常達三四千公尺至五千公尺以上，爲南北天然防線，故唐代前期，唐與吐蕃並盛，國疆時有出入，惟此段國界維持穩定，且與今甘肅青海省界亦幾全相當。

自甘州之南，唐蕃境界折而南至河湟青海湖地區。此區以西，固有祁連山脈之阻；此區以南，亦有岷嶺邛崃山脈及其西之縱貫山脈爲屏障；惟此河湟青海地區，黃河自西而東，橫貫全境，形成槽型地帶，爲東西交通要道，亦爲東西政權必爭之地。漢代已經營河湟，置西海郡（青海湖北岸）、西平郡（湟水流域）。北周武帝復有經營。隋煬帝征吐谷渾，置河源、西海兩郡，西海郡治吐谷渾故都伏俟城，即今青海湖西岸鐵卜卡古城（約 $N37^{\circ} \cdot N99^{\circ}40' - 50'$ ），河源郡治赤水城，在九曲黃河之外，約今興海縣（ $E100^{\circ} \cdot N36^{\circ}$ 之南）地區。故河湟青海湖及九曲河西，全入隋境。⁹ 唐代前期，吐蕃強盛，滅吐谷渾，與唐接境，時起爭端。唐廷經營河湟青海，以鄯州（今樂都縣）爲軍政中心，先後置鄯州都督、隴右節度使，即故西平也。其與吐蕃之疆界：黃河以南，唐土西盡九曲（今貴德、共和以西黃河大弓出處），與吐蕃「以河爲界」。睿宗景雲中，吐蕃賂鄯州都督楊矩，獲九曲之地，爲金城公主湯沐邑，遂伸其境於黃河之東，置獨山九曲兩軍。¹⁰ 黃河以北，國界在鄯州西境至青海湖東岸，但不能詳。開元二十二年，協議「立碑於赤嶺，以分唐與吐蕃之境。」赤嶺者，始見於唐開國前恰一百年之宋雲行紀，爲通西域南道之口，亦唐與吐蕃互市場，地在鄯州西南三百二十餘里，即青海湖東南角，今哈拉庫圖（ $N36^{\circ}25' \cdot E101^{\circ}10' - 25'$ ）西二十五里之日月

9 《隋書》〈地理志〉上，「西海郡，置在古伏俟城，即吐谷渾國都。有西王母石窟、青海、鹽池。」「河源郡，置在赤水城。有曼頭山；積石山，河所出；有七烏海。」按伏俟城在青海湖西岸，即今鐵卜卡古城（約 $N37^{\circ} \cdot E99^{\circ}40' - 50'$ ），赤水城在九曲黃河之外，約今興海縣（ $E100^{\circ} \cdot N36^{\circ}$ 之南）地區。詳《圖考》卷二，篇十三，頁 552-558。則隋代盛時國疆外拓至青海湖西、黃河九曲之西，大積石山之北境。

10 《舊唐書》一九六上〈吐蕃傳〉：「睿宗即位，……時楊矩爲鄯州都督，吐蕃遣使厚遺之，因請河西九曲之地，以爲金城公主湯沐之所，矩遂奏與之。吐蕃既得九曲，其地肥良，堪頓兵畜牧，……自是復叛。」盧懷慎〈請毀河橋奏〉（《全唐文》二七五）云：「頃者，吐蕃以河爲界。神龍年中，降公主，吐蕃遂過河築城，置獨山九曲兩軍，去積石三百里。」按九曲即漢大榆谷、小榆谷肥沃之地，約今貴德共和以西黃河向西凸出處，詳《圖考》卷二、篇十三、頁 543-545。積石軍在古澆河城，今貴德縣（ $E101^{\circ}30' \cdot N36^{\circ}$ ），詳同上頁 539、540。

山（海拔三八〇〇公尺）隘道。但旋即廢毀。¹¹天寶後期，極力經營河湟青海地區，拔石堡城（今哈拉庫圖），取龍珠島（青海湖心），增置軍城至二十餘，分佈於湟水上游、黃河內外，西極九曲及青海湖心龍珠島，島上置神威軍，是爲此一地區唐疆之極邊。¹²

黃河東流經大積石山（高峯多達四千五百公尺以上，一名阿尼瑪卿山）之南，至山脈尾閭，向西北作一百五十度大折曲，流於山脈之北，至九曲地區。此西北流向河段之北爲西頃山脈，與河平行。唐代初年，「從河首大積石山已東，並爲中國之境。」¹³其後吐蕃強盛，唐蕃國界，可能已稍內縮，蓋由九曲地區走向東南，略循西頃山脈而東，至松潘高原草地。¹⁴高原東有岷嶺山脈，走向東南；南有邛崃山脈，走向正南；高原邛崃海拔多達三千五百公尺至五千公尺以上，爲天然國界。唐代初期，於今松潘高原置州甚多，而以松州疊州爲軍政中心。¹⁵松州在今松潘。疊州在其西北，南枕羌水（白江，今白龍江），西至黃河二百八十里，約在今包座河流入白龍江口（約E103°·N34°地區，今有迭部縣）。¹⁶疊州之南，松州西北，武后時有潘州，置通軌軍於松潘等州，屯兵萬人，以禦吐蕃。潘州在松州西北三四百里或稍遠，約在黃河支

11 詳《圖考》卷二、篇十三、頁 532-533。

12 詳《圖考》卷二、篇十三，參看圖八〈唐代長安西通隴右河西道、河湟青海地區交通網圖〉。石堡城見頁 529-531。龍珠島，見頁 552、558。

13 《唐會要》九八黨項羌目：「貞觀三年，南會州都督鄭元璫遣招諭，其長細封步賴舉部內附，……列其地爲軌州，拜步賴爲刺史。其後諸部相次內附，列其地爲岷奉巖遠四州，各拜首領爲刺史。五年，詔遣使開其河曲爲六十州，內附者三十四萬口。有羌酋拓拔赤詞者……屢抗官軍，後……率衆與諸首領歸款，列其地爲懿嵯麟可等三十二州，以松州爲都督府，羈縻存撫之。拜赤詞爲西戎州都督。……自是從河首大積石山已東，並爲中國之境。」

14 上引《會要》黨項羌目續云：「後吐蕃強盛，拓拔氏漸爲所逼，……始移部落于慶州……故地陷于吐蕃。」是國疆內縮。然玄宗時代，河曲以東置軍尚甚多，惟大抵在北境，接近黃河，去西頃山脈較遠。（參詳《圖考》第二卷、篇十三，及圖八。）則此時殆以西頃山爲境矣。

15 松疊兩州皆置都督府，詳拙作〈括地志序略都督府管州考〉（《唐史研究叢稿》）。

16 《元和志》三九疊州，「今州城在獨山上，西臨絕澗，南枕羌水。」「西至黃河上黨項岸〔界？〕二百八十里。」（《寰宇記》一五五，岸作序州，疑誤，岸亦當作界。）今地詳《圖考》卷四、篇二十五〈岷山雪嶺地區松茂等州交通網〉，頁 953-954。檢中共圖集，此處置迭部縣，在白龍江北岸，仍存疊音。

流墨溪河流域今與中縣地 (E102°50'·N33°25')，¹⁷ 則其時唐蕃蓋以墨溪河（黑河）或其西之邛崃山脈北段爲界。惟《通典》云，疊州西北七十里，西九十里，西南七十里，南三十里，皆至吐蕃界，¹⁸ 似其西境墨溪河流域之松潘草原，皆吐蕃牧地。或開元天寶時代，疊州之西，唐疆已稍內縮。《通典》等又云，松州北一百九十里，西北五十里，皆至吐蕃界，¹⁹ 則此地段唐疆內縮更逾百里以上。

邛崃山脈又南，有梭磨河 (somo) 自北而南，流於山脈中，至馬塘 (E102°55'·N31°55') 折西流與諸源相會，爲大渡河。梭磨河，唐名索磨川；大渡河，唐名弱水。唐初於索磨川置洪州，在恭州西北三百七十里，約在今中壤口 (E102°35'·N32°30') 地區，後陷吐蕃。天寶八載，鮮于仲通復故地，「改洪州爲保寧都護府，塹弱水，爲蕃漢之界。」索磨川西，山脈高聳達五千餘公尺，蓋即國界；自此以南則以弱水爲界歟？²⁰ 或者此弱水即指索磨川而言，洪州、保寧都護府置於川之東岸歟？《通典》云，恭

17 潘州：唐代書志無潘州之名。然陳子昂《上蜀川軍事狀》（《全唐文》二一一）云：

「臣伏見劍南諸州，緣通軌軍屯在松、潘等州，千里運糧，百姓困弊。……臣伏惟松、潘諸軍，自屯鎮已來，於今相繼百十餘年（蓋自周隋在此屯兵數之），竟未聞盜賊大侵，而有尺寸之效。……聞松、潘等州屯軍數不逾萬……。伏以……松、潘屯兵未可廢散……。」

按此狀上於武后時，屢言「松、潘等州。」又《上益國事狀》（同上）亦云「松、潘諸軍」「松、潘軍糧」。則唐代前期，至少武后之世曾置潘州。蓋安史亂前，開元天寶時代，地已陷屬吐蕃，故《六典》、《通典》皆已無此州名。至北宋，復置潘州，且有上中下之別，下潘州在明代松潘衛北一百里，中潘州去衛二百五十里，上潘州去衛殆四百里以上。松潘衛即拼合松、潘兩州名之，治松州，即今松潘縣也。檢《民國地圖集》、四川兩圖，松潘西北航空距離約一百二十里處有與中縣 (E102°50'·N33°25') 有「古潘州」之名，中共圖集有達札寺，在墨溪河流域小盆地中，殆即唐之潘州，北宋之上潘州，宋之邊疆例較唐爲內縮，未見外伸也。說詳《圖考》同上篇、頁 969-971。

18 見《通典》一七六疊州合川郡。《寰宇記》一五五錄《通典》，而有奪譌。

19 《通典》一七六松州，「北至吐蕃九十里」，「西北到吐蕃界五十里。」《寰宇記》八一松州，云「北至吐蕃界一百九十里」，「西北至吐蕃界五十五里。」檢《元和志》三二松州，嘉誠縣在郭下，「寧遠鎮在縣北一百里。」是州北百里仍屬州境，《通典》當譌。又此處諸州書例，皆云至「吐蕃界」，《通典》此條無界字，似亦有問題，蓋奪「界一百」三字歟？

20 顏真卿《鮮于仲通碑》（《全唐文》三四三）云：

「郭公（虛己）將圖弱水西之〔山？〕八國，奏公入覲……拜劍南行軍司馬。既略三河，收其八國，長驅至故洪州，與哥舒翰隴右官軍相遇於橫嶺。……郭公云亡……拜公爲劍南節度副大使。……討吐蕃摩彌城，拔之，改洪州爲保寧都護府，塹弱水爲蕃漢之界，收戶數十萬，闢土千餘里。」

據《唐會要》七三姚州都督府目及《新志》劍南道，保寧都護府以天寶八載，於索磨川置，領牂柯、吐蕃。據《冊府》一七〇《帝王部》《來遠目》，索磨與白狗國相近，在奉州（維州之西）之西。又《寰宇記》八〇《恭州目》，「北至故洪州三百七十里。」則索磨

州「北接吐蕃」，又云「北至吐蕃白崖鎮七十里。」白崖約在黑水上游 E103°15'·N32°30' 地區。²¹ 蓋其後吐蕃東侵所據，唐疆已內縮三四百里。

又南至奉州雲山郡（約今雜谷腦 E103°20'·N31°27'）西境。州西一百三十里天寶軍（約今邱地 E103°5'·N31°30'）之西，正爲邛崃山脈之脊，爲此段唐疆之極邊。²² 由奉州西南折而東，州南八十里與吐蕃野城接境。²³ 又東維州之南一百六十里，亦與吐蕃接境。州西南六十二里有白狗嶺（今有尖光山），蓋白狗羌地，嶺南蓋卽吐蕃也。²⁴

（續）川、洪州、保寧都護府必在今四川西北、雜谷河、黑水河上游之西北地區。檢今圖，其處適有梭磨河（somo），爲大渡河上游之東源，由 E102°25'·N32°50' 地區東南流至馬塘（E102°55'·N31°55'），折西流與大渡河其他諸源相會。唐籍索磨川卽此水無疑。則唐之洪州、保寧都護府卽置在今梭磨河中游一帶約中壤口地段無疑。參詳《圖考》第四卷、篇二五、頁 991、992。

惟此處所當補明者：〈鮮于碑〉「弱水西之八國」。按此種句法，當時文體殊極少見。又弱水通常指大渡河而言，然此八國絕不得在大渡河之西。本碑下文云，既收其八國，長驅至故洪州。則八國應在洪州東南。按唐籍常見「西山八國」之語，如楊譚〈兵部奏劍南破西山賊露布〉（《全唐文》三七七）云，「吐蕃舉國興兵，資其叛逆，頃者西山戰士及八國子弟，因其窘逼，遂欲憑凌。」此爲較早見之史例。據《舊唐書》一四〇〈韋臯傳〉，「招撫西山羌：女（國）、訶陵、白狗、逋租、弱水、南水等八國酋長。加統押近界諸蠻及西山八國、雲南安撫使。自後歷任劍南節度皆加「統押西山八國」，此西山八國大抵皆在今大渡河以東之山區，疑碑「西之」爲「西山」之譌。詳〈唐五代時期之成都〉（《香港中文大學中國文化研究所學報》第十二卷）第二節劍南節度使加押西山八國條。

- 21 《通典》一七六〈恭州目〉。按《寰宇記》八〇作「北至土〔吐〕蕃白山〔崖〕鎮七十五里。」是略同。又《元和志》三二，恭州目不記；而柘州蓬山郡目云，「其城四面險阻，易於固守。有安戎江蓬婆水，在州南三十里。」郭下柘縣，「柏嶺在縣北八十里，嶺北三十里至白崖驛，與吐蕃接界。」按安戎江卽黑水（今名同），蓬婆水卽今圖之雅爾薩河，則柘州在今兩水合流點（E103°15'·N32°10'）之北不過三十里，恭州又在柘州之西北三四十里。是兩處所記白崖、吐蕃界實相吻合。度白崖鎮驛亦只在兩水之會之北百十里耳。其經緯度可略測也。柘恭地望詳《圖考》第四卷、篇二五，頁 976-979，992-994。
- 22 《通典》一七六奉州雲山郡，「南接吐蕃」。領縣一，定康。「東至維川郡（維川）風流嶺四十里，南至吐蕃野城八十里，西至天寶軍一百三十里。」《寰宇記》八〇保州雲山郡，略同；惟作風流鎮。按風流嶺鎮在維州西約一百二十里，約今雜谷腦（E103°20'·N31°27'）地，則天寶軍當在猛董溝流域，約今邱地（E103°5'·N31°30'）地區。詳《圖考》第四卷、篇二五，頁 989-991。其西東經 103° 線正爲邛崃山脈之脊。
- 23 見注①引《通典》。《寰宇記》，同。按吐蕃野城，在此西南頗遠，詳下文。蓋奉州南八十里卽野城轄境。檢今圖，雜谷腦南數十里有天成山，海拔二八二九公尺，蓋卽以此山爲境耳。
- 24 《通典》一七六維州維川郡，「東南到吐蕃界一百六十里，西南到白狗嶺六十二里。」《寰宇記》七八，同。按維州在今理縣（E103°25'·N31°32'），檢今圖，東南實當爲正南，今汶川縣岷江西岸，其地有尖光山，海拔二八七九公尺，白狗嶺蓋爲此山區之一嶺。《元和志》三二維州，「武德七年，以白狗羌首領內附，於姜維城置維州以統之。」《寰宇記》七八維州略同。疑此嶺殆卽白狗羌之故地。

國界又取岷江西岸山線而南，至灌口鎮（今灌縣）西境。青城山在灌口西南五十里，青城縣（灌口西南四十里）西北三十二里。山西南諸山連接有大面、高臺、天倉、傍便諸名。大面山即青城後山，傍便山在灌口西南一百三十里（約今圖神仙洞 $E103^{\circ}23' \cdot N30^{\circ}50'$ 之西地區），「豁谷深邃，夏積冰雪」，與大面山並「當吐蕃之界」。²⁵ 大中七年吳行魯西巡至石門獠澤，在大面山之北，一名老人村，東北去灌口約百里，蓋即唐疆之極邊，且有道入吐蕃境也。²⁶ 至於《通典》云，蜀州（今崇慶縣）「西至青山八十里，吐蕃界，不通。」殆即就傍便山之東麓而言耳？²⁷ 檢視今圖，石門、大面山、傍便山之西正即邛崃山脈之脊背羊子嶺（ $103^{\circ} \cdot N30^{\circ}50'$ ），貝母山（ $E102^{\circ}$

25 據《元和志》三一彭州目、蜀州目，及《寰宇記》七三永康軍目，灌口鎮在導江縣西二十六里，宋置永康軍。鎮西南四十里有青城縣，縣西北三十二里有青城山，道經云第五洞天。《寰宇記》又云，「傍便山在縣西，高下與青城山相連接，當吐蕃之界，豁谷深邃，夏積冰雪，此山所謂隔夷夏也。」其《四至條》又云，「西南至青城縣大面山後水為界」，蓋亦謂與吐蕃為界也；又《輿地紀勝》一五一永康軍景物目有天倉山、天倉洞、高臺山、大面山、傍便山。《方輿勝覽》五五永康軍有天倉、高臺、大面諸山。《勝覽》云，青城山「前號青城，後曰大面山，其實一耳。」按灌口鎮，宋置永康軍，即今灌縣治。檢《紀要》六六四川〈名山條〉，青城山在灌縣西南五十里，高臺山在縣西南七十里，又西南十里曰天倉山，又西南為傍便山（當作傍便山）在縣西南一百三十里。又《紀勝》天倉洞條，「唐咸通中，河東薛逢為綿州刺史……遣人訪焉。入洞十許里，仙迹宛然，隔溪見山川居第，然不敢渡而止。」檢今圖，灌縣西南有神仙洞（ $E103^{\circ}23' \cdot N30^{\circ}50'$ ），海拔二二九九公尺，疑即唐宋天倉山洞也。傍便山又在其西南，蓋亦崇慶之西境。至於大面山，即青城山之後山也。則此一線之唐蕃國界，即在此諸名山之後，深入山區，即邛崃山脈之脊背耳。

26 《輿地紀勝》一五一永康軍〈碑記目〉，〈獠澤水石記〉「在石門崖壁，鎬吳行魯大中七年奉使巡邊行見〈獠澤水石記〉。」又〈景物目〉，獠澤「《圖經》云，在青城縣北一百三十里。或曰，諸葛亮遷羣獠於青城山下，號為獠澤，或云老澤。昔人避難，家其中，皆享年壽，如秦人桃源之類，世世壽考，故云老澤。又名老人村。東坡云，蜀青城山老人村，有五世孫者。道極險遠，生不識鹽醢，而溪中枸杞根如龍蛇，飲其水故壽。近歲道稍通，漸能致五味，而壽亦益衰，見《漁隱崇話》。」《方輿勝覽》五五永康軍，「老人村在大面山之北」，餘略同。又《蜀中廣記》六灌縣條引《志》云，「獠澤關在縣西南百里，乃董仆胡通華捷徑。」按《紀勝》〈風俗形勝目〉引嘉定二年知軍虞剛簡上封事云，「本軍……青城一帶山後不五七十里即是夷界，唐吐蕃入寇，自此塗出。」當即指此塗而言，不自元明董仆胡也。是石門、獠澤、老人村在青城縣北（實西北）一百三十里，青城山後大面山之北，東北至灌口約百里，此殆唐疆之極邊。參詳《圖考》第四卷、篇二五、頁996-997。

27 《通典》文見卷一七六〈蜀州目〉。此據《影宋刊本》，《殿本》作青城山。按《寰宇記》亦有此條，作青山。蓋《殿本通典》因青城山有盛名，而誤增城字耳。就方位里距論之，此青山當在傍便山之正東近地。

55'·N30°40')，唐蕃國界亦因自然地形而分也。

又南至邛（今邛崃縣）、雅（今雅安縣）西境。《通典》以下皆記雅州廬山縣（今縣）西北六十里有靈關（今關 E102°50'·N30°17'），一名盧關，峽口如門，潤三丈，長二百步，極險峻。由此西北約四百里至吐蕃之野城（約今懋功縣地區），與偏松城（蓋在野城之東），度國界當在今加薩山（E102°27'·N30°40'，海拔四〇八五公尺）地區。蓋唐蕃界由今貝母山折而西經天尖山（海拔三一九〇公尺）至靈關、野城之間也。²⁸《通典》諸書云，邛州「西至夷（羌夷）界一百三十里，以山爲界，以西無郡縣相接，亦無道路。」蓋靈關之外，羈縻諸夷，仍屬唐境也。²⁹

境界線蓋又循今夾金山脈，西南至大渡河（弱水），以河爲境。河西有吐蕃之松城（約今康定縣）；河東有和川鎮（約今天全縣），則唐所守。³⁰又循河而南至黎州（今漢源縣、舊清溪縣 E102°35'·N29°35'，或其南漢源場）西境。州西置飛越縣（約今宜東鎮 E102°27'·N29°38'）。又西置廓清鎮，東至州一百八十里，西臨大渡河，爲此段唐疆之極邊。³¹

又南至雋州（今西昌縣）西境。州北臺登縣（今冕寧東）之直西一百五十里有曲

28 《通典》一七六、《元和志》三二雅州廬山縣皆記靈關。《寰宇記》七七，廬山縣在州西北七十里，靈關鎮在縣北八十二里，四面險峻，控帶蕃蠻，一夫守之，可以禦百。「通蠻貊之鄉，入白狼〔狗〕夷之界。」「靈關路在縣界，去蕃界八日程。從界去吐蕃野城三日程。」又《通典》，雅州「西北到吐蕃野城界五百七十里。」《寰宇記》云雅州「西北至吐蕃野城縣界五百七十六里，西北至吐蕃偏松城九日程，約五百里。」約計里距，野城當在今懋功縣地。又據《新書》〈韋阜傳〉偏松城蓋較野城爲東。並詳《圖考》第四卷、篇三三、頁 1261、1262。此條所見三山，皆據《民國地圖集》·〈四川地形圖〉。

29 《通典》云云，見卷一七六邛州目。又云「西北到夷界一百二十里，以山爲界，險阻，更無郡縣。」《寰宇記》七五邛州目並有此兩條，惟「西」作「西南」，又「夷界」皆作「羌夷界」。又《元和志》三一邛州，亦作「西至羌夷一百三十里。」皆不云吐蕃。檢今圖，邛崃縣西北，西南一百二十里，固尙不到上考之山脊也。按《寰宇記》七五邛州〈風俗目〉，「此郡與夷獠相雜，愈於諸郡。」又七七雅州管轄和川夏陽等羈州四十六。其中和川路三十七州，夏陽路九州，又有吐蕃投降部落。夏陽路即靈關路，《舊志》四，雅州廬山縣有關，「俗呼爲盧關，關外卽生獠也。」是卽與邛州接壤諸夷也。

30 《寰宇記》七七雅州嚴道縣，「和川路在縣西界，去吐蕃大渡河（《紀勝》引有界字）五日程，從大渡河西郭（？）至吐蕃松城四日程。羌蠻混雜，連山接野，鳥路沿空，不知里數。」和川、松城之今地，參詳《圖考》第四卷、篇三三、和川路條，頁 1264-1266。余據《民國地圖集》·〈四川省地形圖〉，擬定唐蕃國界當在夾金山脈。檢《中共圖集》58〈四川省圖〉，雅安地區與甘孜藏族自治州正以此山脈爲界，蓋所從來久矣。

31 《圖考》第四卷、篇三三、黎州西道條、頁 1267、1268。今漢源縣，《中共圖集》南移至富林（E102°36'·N29°18'）。

羅磨些部落，當瀘水（今雅礱江）縈迴三曲處，約今瀘寧縣(E101°50'·N28.30')地。其西蓋入吐蕃境。³² 又南，國界當在昆明縣（今鹽源縣 E101°35'·N27°35'）西境。昆明俗稱鹽井，置昆明軍，管兵五千二百人。又南（蓋西南），置寧遠軍（蓋今寧蒗縣境東），管兵五百人。蓋鹽產國防兩重，故比境置軍也。³³

國界蓋由昆明、寧遠西境循今綿綿山脈（光茅山海拔四六七九公尺）而南至瀘水（今金沙江）。瀘南今爲雲南省境，兩漢時代大半已入版圖。蜀晉南朝僅能控有東北一隅，以寧州（今曲靖縣舊南寧縣）爲經營中心。³⁴ 唐代初年，環瀘水之南至滇池南北皆在版圖，置郎（南寧州，今曲靖縣）、曲（今昭通縣）、協（北接戎州，南接曲州）、昆（今昆明市）、盤（北接郎州，南接交州）、黎（北接昆州）、匡（治勃弄縣，蓋姚州之西），茅（東北至瀘水，西南接姚州）、尹（北接茅州）、曾（西接匡州）、鉤（東北接昆州）、靡（南接姚州）、褒（南接姚州）、宗（北接姚州）、微（東接靡州）、姚（今姚安縣）凡十六州，皆著錄於《括地志》。³⁵ 其後創羈縻州之制，此諸州蓋多退爲羈縻州，故《六典》、《通典》僅錄姚州，《元和志》僅錄姚協曲三州。³⁶ 惟《舊唐志》、《寰宇記》著錄此十六州之方位及去京師之里距較詳，可據以略定唐疆之所至。

大抵唐疆有今雲南省東北半部，而以姚、昆、郎（南寧）三州爲西中東三個軍政中心。³⁷ 姚州都督府「爲瀘南之巨屏」，所統境域最保留之推估當西抵洱海，即西南

32 《蠻書》一〈雲南界內途程〉：「臺登城直西有西望川，行一百五十里入曲羅。瀘水從北來，至曲羅，縈迴三曲，每曲中皆有磨些部落。……瀘水從曲羅南經劍山之西，又南至會同川。」此瀘水即今雅礱江無疑，曲羅正即今瀘寧地帶。

33 兩軍皆見《通典》一七二、《元和志》三一。詳《圖考》第四卷、篇三三、昆明縣條，頁1270、1271。

34 《圖考》第四卷、篇三二〈漢唐川滇東道〉、頁1233-35。

35 《括地志》〈序略〉列貞觀十四年三百六十州之名，此十六州已在其中，（惟「黎」字蓋譌爲「州」字。）故知唐初已入版圖，且爲正州也。諸州詳情看下注③引《舊志》與《寰宇記》；並參看拙作〈括地志都督府管州考〉（《唐史研究叢稿》）。

36 《唐六典》三戶部、《通典》一七六、《元和志》三二。

37 《元和志》三二姚州，武德四年，「置姚州，爲瀘南之巨屏。」《舊志》四姚州，武德四年置，「管三十二州。」又《新》二二二上〈南蠻傳〉上，天寶中，南詔叛，「取姚州及小夷州凡三十二」蓋即所管者。昆州濱臨滇池，爲莊蹻故都，自古爲軍政扼要地。唐利其鹽井，築安寧城，所謂「置府東爨，通路安南」也。後爲南詔所據，爲重鎮，有別都之目。詳《圖考》篇三二、頁1239-45。郎州即南寧州，自蜀漢以來，爲經營南中之基地。《舊志》郎州條，唐初曾置都督府，管十六州，即前列十六州也，具知唐初仍以此爲瀘南軍政控扼之中心也。

國疆之所至。由此而東南，繞今楚雄之南、馬龍河（紅河、元江之上游）上游，又沿流而東南，皆與南詔爲界也。³⁸ 當唐最盛時，此界外南詔之地亦在羈縻之列，其他羈

38 《舊唐志》四、《寰宇記》七九戎州目後列十六州如次：

- 協州 北接戎州，去京師四〇〇〇里。
- 曲州 北接協州，去京師四三三〇里。
- 郎州（南寧州） 北接曲州，去京師五六七〇里。
- 昆州 北接嵩州，去京師五三七〇里。晉寧縣有滇池，周三百里。
- 盤州 北接郎州，南接交州，去京師五〇三〇里。盤水縣即舊興古郡。
- 黎州 析南寧州（郎州）置。北接昆州。（不記去京師里數。）有梁水縣、絳縣。
- 匡州 （不記方位），去京師五一六五里。有勃弄縣；匡川縣「縣界有永昌故城」。《新志》云「本南雲州」，「漢永昌郡地。」
- 髡州 南接姚州，去京師四八五〇里。青蛉縣舊屬越嵩郡。
- 尹州 北接髡州，有馬邑、天池、鹽泉、甘泉（《記》作百泉）、涌泉五縣。
- 曾州 西接匡州，去京師五一四五里。
- 鉤州 北接昆州，（《新志》七下，作「東北接昆州。」）去京師五六五〇里。
- 靡州 南接姚州，去京師四九四五里。
- 褒州 南接姚州，去京師四九七〇里。（《新志》云「本弄棟地。」）
- 宗州 北接姚州，去京師五〇一〇里。
- 徽州 東接靡州（《新志》作北接）去京師四九七〇里。
- 姚州 去京師四九〇〇里（《記》作四〇三〇里）。

觀此十六州記錄，除戎協曲郎自北而南一線排列外，顯可分爲東西兩個州羣。西羣以姚州爲中心，有褒髡尹靡微曾匡宗八州圍繞之；東羣以郎昆爲基線，有盤黎鉤三州分佈於其南，再南即接交州。姚州爲唐代前期「瀘南之巨屏」，在今姚安縣，詳《圖考》第四卷、篇三一〈川滇西道〉，頁1205、06。郎州即南寧州，爲蜀漢庾隆都督及建寧郡所治，東晉以下亦爲經營南中之中心根據地，在今曲靖縣（舊南寧），詳《圖考》同卷，篇三二〈川滇東道〉，頁1233-35。交州即今越南河內境。又昆州「有滇池，周三百里。」即今昆明地無疑。此四州地望既可確知，可據以略定姚州四周、昆郎以南諸州之地望。茲參考前人舊說擬測如下：

髡靡褒皆在姚州之北。按褒州似在今大姚縣稍東，《圖考》篇三一〈川滇西道〉有陽褒館，在姚州北（東北）七十里。髡州所領蜻蛉縣，舊屬越嵩郡。又《華陽國志》三〈蜀志〉，越嵩郡「三逢縣，一曰小會無，……通寧州，渡瀘得蜻蛉縣。」三逢舊說在今會理縣，渡瀘而南即至蜻蛉，當去瀘水不遠，是當在姚州之北而偏東。靡州當在髡州之西，故去京師亦較遠，是當在姚州之西北也。徽州則在靡州之西不遠處。尹州在髡州之南，或當在姚州之東。匡州云有永昌故城，據一般里距言，當只在姚州西不應太遠，此必非漢永昌城故地，無疑。《新志》云漢永昌郡地，或較近之。舊說匡州在今祥雲縣南，南詔置雲南州（唐州本名南雲）。今雲南驛地，蓋略近之。所領有勃弄縣，勃弄川固在洱海東南白崖地也。曾州西接匡州，則在姚州之西也。宗州在姚州之南蓋百餘里，舊說在今鎮南縣，略可信。以上八州圍繞姚州，半徑殆不過二三百里，此爲西面州羣也。

麅州當亦不少，然地望不詳，姑不深論。

今馬龍河（禮社江）、元江即酈《注》之勞水、僕水，³⁹沿流南岸，哀牢山脈自西北走向東南，三千公尺以上之高峯連珠疊起，⁴⁰為天然之國界。勞僕水東之葉榆水（今盤龍江）為自漢以來之滇越水陸道交通幹線，⁴¹唐世沿途置晉寧驛（今縣）、中川縣（今縣）、絳縣、通海縣（今縣）、曲江、南陽、沙隻等館、龍武、祿索、湯泉等羈縻州，至古勇步（今文山縣境），又沿流經甘棠、奇富、多利、忠誠、登州等羈縻州，至峯州都督府，又一百三十里至安南都護府。⁴²此道全線固屬唐境；勞僕水上之步頭（今蠻耗或其西北）東南「船行沿江（即僕水今紅河）三十五日出南蠻（南詔）」，⁴³蓋本亦唐境。

峯州（約今盤龍江、元江合流處，E105°25'·N21°20'）統羈縻一十八州，幅員甚大，度其西境當今元江西 海拔三千公尺以上哀牢山脈之脊（E104°20' 線），蓋即唐疆所屆。⁴⁴

（續）至於東面州羣，盤州北接郎州，南接交州，舊與古郡地。按與古郡在今南盤江上游，曲靖縣之南，後蓋遷貴州省西境，是在唐郎州之東。唐盤州即以盤江受名，固當在與古郡舊地，今宗師、瀘西（廣西）、彌勒一帶，故云南接交州也。（參看《圖考》第四卷、附篇七〈水經注葉榆水下游即今盤龍江辨〉頁1317-1319）。鉤州、黎州皆在昆州之南，然黎州係析南寧州（郎州）所置，是當在昆州東南，所領梁水縣，固亦在今昆明東南也。（參《圖考》同卷、頁1318地圖。）則鉤州當在其西，《新志》云東北接昆州，最為正確。舊說鉤州在今建水縣似太遠，似當於晉寧西南，江川之西求之。

以上為唐代前期瀘水以南十六州之地，雖時或退為羈縻州，《（新志）》惟姚州為正州，餘十五皆為羈縻州。）然至少可知為最重要最穩定者，其餘羈縻州尚有七十有餘，（州名參看《寰宇記》七九卷末；《新志》七列戎姚兩州所管九十二羈縻州名稱甚詳。），就中傍州、覽州，舊說在今楚雄縣境，則在上述東西兩州羣之間。據此言之，唐代前期盛時，瀘南國疆最保留之推估當如網文所述。

39 參看楊氏《水經注圖》南十五卷、西九，南十六卷、西九，南十七卷、西八，及《水經注疏》三三〈江水注〉，兼參《圖考》第四卷、附篇七〈水經注葉榆水下游即今盤龍江辨〉、頁1318、1319。

40 《民國地圖集》·〈雲南地形圖〉，ONC-J-11。

41 《圖考》第四卷、篇三五〈漢晉時代滇越道〉，篇三六〈唐代滇越道〉。

42 同上篇三六〈唐代滇越道〉。

43 《蠻書》六〈雲南城鎮篇〉，「通海城南十四日程至步頭，從步頭船行沿江三十五日出南蠻。」步頭地望詳《圖考》第四卷、篇三六〈唐代滇越道〉。

44 《元和志》三八峯州，東南至安南府一百三十里，北至羈縻南平州二百里。《寰宇記》一七〇峯州，東南至安南府陸路一百三十里，西北沿西道江至古勇步約八十里。（數字有脫譌。）又交州同，惟譌「峯」為「岑」。《元和志》又云，州境東西九十七里，南北六十里。本州幅員雖不大，但「兼管羈縻州二十八」。《新志》七下亦云峯州都督府管「蜀蠻蠻州十八，（二十八、十八可能有一譌。）貞元七年領州名逸。」則統攝範圍實甚廣。元江西哀牢山脈脊高三千公尺以上，及經度皆見 ONC-J-11。

國疆又南至愛州西境。愛州在今清化 (E105°47'·N19°47') 之西約百里，蓋壽春 (Tho Xuan, E105°30'·N19°55')、沛上 (Bai Thuong, E105°23'·N19°53') 地區。⁴⁵ 州西北行一百九十里至生獠界，蓋今朱江 (梁江) 上游，約桑頭 (Sam Teu, E104°38'·N20°) 地區，州西北陸路三百里至生獠柵，蓋今馬江上游，約 E104°30'·N20°30' 地區，疑皆羈縻區也。⁴⁶ 愛州東西距二百八十二里，度其西界當在 E105° 稍西，正約桑頭一線。此線山脈自北徂南，高峯多達海拔一千五百公尺以上，蓋亦自然疆界也。⁴⁷ 若此西生獠，亦在羈縻州之列，則唐疆更在其西安南山脈之脊背矣。

又南至演州、驩州西境。演州在今演州城 (Phu Dien Chan)，無異說；但西疆無考。⁴⁸ 驩州約在今宜安 (Vinh, E105°40'·N18°38') 或稍西稍南地區。⁴⁹ 常統若干

45 愛州，《紀要》一一二清化府，即唐愛州。今中西學人皆承此說，已成定論。然《元和志》三八愛州「東至海州一百四十里。」考證云衍「州」字。按《寰宇記》一七一，愛州「東至海陸路一百四十里。」則《元和志》《考證》是也。此為愛州地望最早且比較具體之兩條史料，方向里距又同，不當置之不理。且《元和志》云，「西北至安南都護府五百里，水路七百里。」《考證》疑「西北」宜作「東北」。檢《寰宇記》〈愛州目〉，正作「東北至交州五百里，水路七百里。」知「東北」為正。又《舊志》四，愛州在交州西。則就陸路而言，愛州當在交州之西南。今清化在河內之正南，與上引兩書所記，州在海西一百四十里之記載，不相契合。今清化城東距海不過三四十里，明非唐愛州城所在。故可推測唐之愛州雖在今清化府境，但在城西約百里。檢今地圖，當在壽春、沛上地區。沛上今猶當南北交通要地。

46 《元和志》，愛州「西至小獠界水行一百九十里」，「西北至小獠柵三百里。」按《寰宇記》作「西至生獠界，水路一百九十里。」，「北至生獠界陸路三百里。」作生獠是也。參之 ONC-J-11 及《世界地圖集》·〈越南寮國柬埔寨圖〉·〈越南北部與寮國圖〉，由愛州向西水路上行必即今之朱江 (梁江)，以水程計之，生獠界約當在 E105° 之西，則當於桑頭地區求之。西北陸路三百里者，以方向難準繩，故亦難定其地，但要在 N20° 以北，今馬河上游地耳。兩河上游已入深山，四境山峯多達一千五百公尺以上，為虛賓高原之東緣。

47 《元和志》，愛州東西二百八十二里，是東西幅度甚寬，參之上揭三圖，最保留之估計，西疆至少應抵 E105° 稍西地帶，即今桑頭一線。

48 《元和志》三八演州，「北至愛州二百五十里，南至驩州一百五十里，東至大海六里。」《寰宇記》一七一，同。又《元和志》記演州、愛州去上都、東都里距之差，亦皆為二百五十里。故演州北距愛州、南距驩州之距離比例至為確定，又東近大海，檢之今圖正即在今演州 (Phu Dien Chan, E105°35'·N18°58') 無疑。但西疆所至無考。

49 《方輿紀要》一一二安南乂安府，驩州城在府西南。按乂安即今宜安 (Vinh, E105°40'·N18°40') 此殆為自古相傳之通說。近代西方學人說驩州者甚多。馮譯馬司培羅 (G. Maspero) 《占婆史》，亦謂在今乂安、河靜。其他尚有清化、德壽、河靜諸說。黃盛璋已為論證確認在宜安是也。詳其所著〈文單國——老撾歷史地理新探〉(《歷史研究》1962 年 5 期) 及〈賈耽路程驩州通文單國道地理與對音〉(《歷史地理》第五輯)。按驩州之在今宜安，

羈縻州。⁵⁰ 州西北至靈跋江四百七十里，約今越寮國界 (E104°·N19°15'-40') 地段，疑今國界即唐疆所至。⁵¹ 又州西至羈縻暑州二百四十里，約在 E104°40'·N18°30' 地區。國界當在其西。⁵²

又驩州爲南通林邑國（環王國），西南通文單國（扶南國、陸真臘）之交通樞紐。⁵³ 自州「西南三日行，度霧溫〔濕〕嶺（約今歌女峽 Keo Neua, E105°10'·N18°23'），又二日行至棠州日落縣，又經羅倫江（蓋今南通河、嘉定河 Nam Cading）及古朗洞之石密山，三日行至棠州文陽縣，又經蔡蔡澗，四日行至文單國之算臺縣，又三日行至文單外城，又一日行至內城，（今萬象，即寮國首都永珍 Vien Tiane,

（續）已無可疑，惟具體準確位置，則甚難論定。黃氏第二文認爲當在宜安之南不遠，藍江北岸，邊水縣（宜安南極近處）附近。但引 H. 馬佰樂之南壇（南棠）說及越南人陶維英之藍城山說。按南壇約今《世界地圖集》·〈越南北部與寮國圖〉之永州（義禮 Nghi, E105°30'·N18°42'）亦在藍江北岸；藍城山，據黃文，在南壇東南、宜安西南之興元縣，即在宜安稍西南也。宜安稍西，即與中國舊說爲近。按《元和志》三八，驩州東至海一百里。《通典》一八四，驩州東南到海百五十里；《寰宇記》一七一，同，惟作「南」蓋小譌。是州城在海岸之西約百里，似在宜安稍西爲正。惟此類問題甚難論定，亦不必強定，但期將來考古發現耳。

50 《舊志》四，驩州，「貞觀初改爲驩州，以舊驩州爲演州。二年，置驩州都督府，領驩演明智林源景海八州。十二年廢明源海三州。」《寰宇記》一七一，同。是驩府所管除驩州外，尚有智演林景四州。此五州皆見於《括地志》〈攸〉。《元和志》三八云，驩州「兼管羈縻州六。」蓋亦時有增省也。

51 《通典》一八四，驩州，「西北到靈跋江四百七十里。」《舊志》四，同。《寰宇記》一七一，亦同，惟作靈跋江，字形有異耳。地書特記到此江，蓋即邊境地段；縱已越唐境，但當不遠。其地雖不可考，但就方位論之，此路總當略循今藍江上行，今正有汽車道自宜安西北循藍江上行至巴托洛米山口（E104°5'·N19°28' 有農赫鎮 Nong Het）入寮國境（E104°·N19°25'）。再西即達鎮寧高原（骨巖平原），諸峯海拔達二千公尺至二千七八百公尺，爲中南半島之屋脊，寮越中部諸河流多發源於此。以宜安西南至永珍，唐程七百五十里（詳下引《寰宇記》等）比例言之，鎮寧高原之東緣，東南至宜安正約五百華里之譜。疑靈跋江即發源於此高原諸河流之一，唐疆蓋至高原之東緣地帶，頗疑今日越寮此段國界（E104°·N19°15'-40'）即承唐疆之舊歟？

52 《寰宇記》一七一驩州，「西至羈縻暑州二百四十里。」國疆當在其西，可參注⑤及下驩州西南疆定之。

53 《新志》七下錄賈耽通四夷七道及《寰宇記》一七一，皆云驩州有西南通文單國、東南通環王國兩道。詳下文。而《元和志》三八演州目云，「其州西控海，當中國往林邑（即環王）、扶南（即文單）之大路也。」似演州爲兩道之會，與賈《記》、《寰宇記》不同。但據《元和志》同條上文，唐初演州本名驩州，殆因此將驩州之交通形勢誤錄入演州目歟？

E102°37'·N17°57') 一曰陸真臘。」棠州一作裳州，羈縻州之一也。則唐與文單國界必在文陽縣與算臺縣四日程之間，約計其地當在 E104° 左右，今嘉定河 (Nam Cading) 與湄公河合流地區。⁵⁴

- 54 自「西南三日行」至「陸真臘」一節，乃《新唐志》七下錄賈耽通四夷七道之文。是由驩州西南五日行至棠州之日落縣，又三日行至棠州文陽縣，又四日行至文單國之算臺縣，則由驩州西南十日上下，始出唐境。又行六日上下即達文單國城。去驩州共約十六日程。《寰宇記》一七一，驩州「西南至羈縻棠州三百里。」又云驩州「西南至文單國十五日程，約七百五十里。」無疑為同一道。且知棠州一作裳州，為羈縻州之一。據此，是日行平均約五十里，十日行即約五百里。《通典》一八四，驩州「西南到當郡界四百里」《舊志》四，同。亦即就驩州都督府所統（包括羈縻州）邊境所至而言耳。州界即國界。文單國即陸真臘，又見《舊唐》一九七〈南蠻〉〈真臘傳〉，「自神龍以後，真臘分為二：半以南近海，多陂澤處，謂之水真臘；半以北多山阜，謂之陸真臘，亦謂之文單國。」《寰宇記》一七七〈真臘國傳〉，同。其地望，伯希和《交廣印度兩道考》上〈陸道考〉云，「巴司將 (Bastian) 曾疑其為萬象 (Vieng Chan) 之異譯。……余以為似應求文單於蘭滄江之下流。」按伯氏所持理由殊為薄弱。近人黃盛璋上揭兩文考證，以為文單國確在今萬象，即寮國首都永珍 (Vien Tiane, E102°37'·N17°57')，並就賈耽所記此道沿途地名，略推定其今地。今按文單國城即今永珍，應可為定論。

賈《記》此道地名多個，最具關鍵性者為霧溫嶺。黃文據《越史通鑑綱目》，「溫」當作「濕」。其第一文以為其地即今日宜安西南通寮國汽車道上之嬌女嶺，在香山之西。第二文引越南史家所述舊說，在嬌女嶺南之霧光山，即今香溪（在香山之南）之西。為尊重越南舊說，不堅持己見；但申言，嬌女嶺路較寬，形勢亦較便捷。今檢 ONC-J-11 及《世界地圖集》第一冊〈越寮東三國圖〉、〈越北與寮國圖〉，今宜安西南有汽車道循一小河上行，經香山、大新至歌女峽 (Keo Neua, E105°10'·N18°23')，峽為越寮國界，渡峽西南經那比 (Nape)，又循小河下行至樂壽 (Lak Sao, E104°58'·N18°10')，接入嘉定河 (Nam Cading) 流域。此道之南，另一汽車道循另一小河上行經香溪西至府關 (Phu Quan)，其西亦越寮國界山嶺 (E105°15'·N18°15')，尚未通車，但嶺西另有未完成汽車道，循一小河向西南下行，再折北，亦至樂壽。歌女峽必即黃文之嬌女嶺；其南未通車之山嶺，蓋即霧光山也。黃文論南北兩山隘，嬌女較寬廣，且通路較直較捷。觀 ONC 圖，此處山脈海拔亦較低，故就交通條件言，嬌女顯較優良。按山以霧為名甚為常見，何況霧濕、霧光，亦不相同。千年以後之今名未必為唐名之舊，固不必泥信越人舊說也，故霧濕嶺即今嬌女嶺（歌女峽）之可能性仍極大。

黃文於此道之其他地名亦略有擬測。《中國歷史地圖集》·〈唐嶺南道西部圖〉，據以入圖，羅倫江即今湄公河支流南通河，(ONC-J-10 作 Nam Kading，《世界地圖集》·〈越北寮國圖〉作嘉定河。)。棠州文陽縣繪於南通河流入湄公河口 (E104°·N18°20') 之東，而繪唐與文單國界於 E103°30' 處，可信為相當合理之推測。唐疆縱不西踰 E104° 線甚遠，至少當在此經度之左右，可無疑也。

驪州東南沿海行百餘里有福祿州（約今河靜 Ha Tinh），又名唐林州，爲唐疆最南之正州，蓋曾統於驪州都督府。⁵⁵ 其西又有羅伏、林、景等羈縻州，後省景州，置金鄰州。其林州、羅伏州並在府南一百五十里，及景州、金鄰州亦皆統隸於驪府。⁵⁶ 福祿州及羅伏州、林州之南與林邑國（環王國）接界。林邑國都城，唐測北極高十七度四分（十分爲度），在今洞海（Dong Hoi, E106°35'·N17°27'），去驪州十日程，約五百里。⁵⁷ 《元和志》云，驪州南至林邑國界一百九十里，蓋就驪府所統全境（包

55 《通典》一八四，驪州，「東至福祿郡界一百里。」《寰宇記》一七一，驪州「東沿海至福祿州一百二里。」是驪州東南沿海行一百餘里至福祿州界，則其州北界約在今河靜（Ha Tinh, E105°55'·N18°20'）地。又《舊志》四，福祿州「龍朔三年，智州刺史謝德成招慰生獠昆明北樓七千餘落，總章二年置福祿州以處之。天寶元年改爲福祿郡，至德二載爲唐林州，乾元元年復爲福祿州。」《寰宇記》一七一、《新志》七上，皆同。是此州頗大。又按《新志》，羈縻州皆綜錄於卷七下羈縻州目，福祿州不在其列，是此州終唐世爲正州，亦唐疆最南之正州矣。疑初置此州，當亦在驪州都督府統督之列。

56 《通典》一八四，驪州「南至羅伏郡界一百五十里。」檢《新志》七下，安南都護府所管羈縻州有羅伏州，即此羅伏郡，蓋驪州後廢都督府，併屬安南都護府耳。又《新志》七上，驪州目，「初以隋林邑郡置林州，比景郡置七州。又更名七州曰南景州。貞觀二年，綏懷林邑（國），乃僑治驪州之南境，領比景、朱吾二縣。……八年第名景州。九年置林州，亦寄治驪州之南境，領林邑（略）三縣。」十三年，省景州。是林州本治林邑，景州本治比景，皆在林邑國境。貞觀二年，爲綏懷林邑國，並北遷僑置於驪州南境也。《舊志》四，驪州「南至林州一百五十里。」是林州與羅伏州皆在驪州之南一百五十里，景州蓋亦略相當，皆在福祿州之西也。貞觀十三年，雖省治比景之景州。但《舊》五《高宗紀》下，儀鳳元年九月「癸丑，於北京置金鄰州。」按北京即太原府，此條必有譌。拙作《舊唐書本紀拾誤》（《唐史研究叢稿》）已據《新書》《地志》七下《羈縻州目》，安南都護府領有金鄰州「儀鳳元年置」事，斷此「北京」必「比景」之譌。今檢《通典》一八八邊防四，邊斗等四國，「扶南度金鄰大灣，南行三千里，有此四國，其農作與金鄰同。」是金鄰在文單國之南，蓋因招慰羈縻而於南疆比景僑置此州也。比景即舊景州治所，則景州雖省，此時復於故地置州曰金鄰州，仍在驪州南境也。由此可見，林州、羅伏州及前置林州後置爲金鄰州，皆爲羈縻州，在驪州南境。其林州、羅伏州皆在驪州南一百五十里，正居福祿州之西也。

57 《新地志》七下，錄賈耽通四夷七道云，「一路自驪州東二日行，至唐林州安遠縣，南行經古羅江，二日行至環王國之檀洞江。又四日至朱崖，又經單補鎮，二日至環王國城，故漢日南郡地也。」按《寰宇記》一七一，驪州「東南至環王國十日程約五百里。」即就此道而言，並指出約略里距。環王國即林邑國，在驪州東南約五百里，則當於 N18° 以南，N17°30' 之北求之。

考《舊書》三五《天文志》錄開元十二年實測若干州縣及林邑國之日影，計算出其北極高度，共有九個數據，茲列錄如下表，並就已知今地之所在者查出其在今圖上北緯度數，對

(續)照列之。(參考《會要》四二〈測景目〉，不詳校。)

唐 代 地 名	唐 測 北 極 高 度 數 (每度10分，每分合今6分)	今 地	北 緯 度 數
蔚州橫野軍	40度(注A)	蔚 縣	N39°50'
滑州白馬縣	35度3分	滑 縣	N35°30'
汴州浚儀縣	34度8分	開 封	N34°50'
河南府陽城縣	34度4分	登 封	約 N34°30'
許州扶溝縣	34度3分	扶 溝	約 N34° 稍北
蔡州上蔡縣武津館	33度8[5]分(注B)	上 蔡	約 N33°20'
朗州武陵縣	29度5[2]分(注C)	常 德	N29° 稍北
安南都護府	20度4分(注D)	河 內	N21° 稍北
林邑國	17度4分	?	?

(注A)《舊志》前文作四十度，《新志》同。而《舊志》後文又作三十度。按〈本注〉云「差陽城五度二分」，知「四十」為正。

(注B)《舊志》前後均作三十三度八分，《新志》同。但《舊志》〈本注〉云「差陽城九分」，則「八」為「五」之譌。

(注C)《舊志》後文作「二十九度五分」，前文作「二十九度半」，是相同。但〈本注〉云「差陽城五度二分」，則「五分」當作「二分」。

(注D)《舊志》前文作二十度四分，後文作二十六度六分。《新志》有前一數據，亦為二十度四分。按《舊志》云，安南「差陽城十四度三分」，則「二十六度」之「六」為衍文。

綜觀此古今對照表，可知古地測得之北極高度與今地緯度絕相符合，差異極小，則古地北極高度實即其地之北緯度數也。唐在林邑國境測量其北極高，小地名雖不詳，然其地北極高17度4分，即約當在今圖 N17°24' 線上。檢 ONC-J-11 及《世界地圖集》、〈越北與寮國圖〉，此緯度左近有大城曰洞海(Dong Hoi, E106°35'·N17°27')，蓋即唐開元測影地。前引賈《記》與《寰宇記》，驪州東南至環王國都城十日程，約五百里。據今圖計之，自宜安東南至洞海正約五百華里之譜，然則測影地在今洞海地區，亦即唐代林邑國後名環王國之都城所在。千餘年前之林邑國都，今能據《天文志》正確指出，實一大快事！

〔此段林邑國都論證文字寫成後，檢讀馮譯伯希和《交廣印度兩道考》，其林邑古都問題條引艾莫涅 Aymonier，林邑國九八二年前之都城在 Dong-hoi(馮譯為東海)。艾說係據宋君榮 Ganbil 神甫引《新唐書》〈天文志〉一行之測影紀錄而推算者。惟伯氏認為「占人(占婆人即謂林邑人)位其國都於極北邊界「虎口」之中，其事未免可疑。至於一行所測，乃中國境內僑置之林邑郡，即《舊地志》所謂「乃於驪州南僑置林邑郡以羈縻之，非正林邑國也。」據此是前人早有據開元十二年測影紀錄以說林邑國都，余孤陋，未先讀識。惟艾說不詳，故伯氏仍有駁論。余此段論證較詳悉，或有助於讀者之瞭解，故仍存之，但特此標明，不敢掠美。至於伯氏所提意見，全出臆想，毫無實據。所云《新書》《天文志》之林邑為羈縻林邑郡者，按《新書》〈天文志〉所記測影本之《舊書》〈天文志〉，《舊志》與《唐會要》明作林邑國，《新志》省「國」字耳。況據前引賈《記》與《寰宇記》，自驪州東南十日行約五百里至環王國城，明指環王國都城，正是今 Dong-hoi 地區。天文地理契合如此，幾為鐵證，何復可疑，故知伯氏駁議，絕不足採！〕

括羈縻州)而言。又據賈耽與《寰宇記》，驩州東南經唐林州至林邑國界，少則一百五十里，多則二百里。則驩府與林邑國接境處當約在兩地之正中間。檢今圖，N18°線上有橫山山脈；即《晉書》〈林邑傳〉，范文據日南，「求以日南北部橫山爲界」之橫山也。其高峯銀山(E106°35'·N17°58')海拔一〇二二公尺，爲今越南海岸線上第一高峯，實南北之天然界限，故山之東麓海濱有安南門之名。此驩府南界，亦即唐代南疆之極邊也。⁵⁸

1988年5月29日草成，6月18日端午節增訂，7月28日復訂

58 林邑國都既明，可進而論唐與林邑國界所在。上文所引賈耽《記》，自驩州東(南)二日行至唐林州安遠縣，又南行經古羅江二日行至環王國之檀洞江。則驩州東南至林邑界當約三日行，不到四日，約一百五十里以上，不到二百里之譜。又《元和志》云，驩州「南至林邑國界一百九十里。」則驩州南至林邑國界，一般不超過二百里，正當在 N18°線地帶。檢 ONC-J-11 及《世界地圖集》·〈越寮柬埔寨圖〉，N18°線上，海岸線持向東突入海中，最尖出處，峯名永山(Vinh Son, E106°30'·N17°57')，緊臨海岸。自此以西，山脈東西橫列於 N18°及稍南地帶，最高峯今名銀山(E106°23'·N17°58')，海拔一〇二二公尺，爲南北數百里海岸線第一高山。《晉書》九七〈林邑國傳〉，「永和三年，(范)文……攻陷日南(約唐之林邑國地)，……鎡平西捲縣，遂據日南，告交州刺史朱蕃，求以日南北部橫山爲界。」伯希和《交廣印度兩道考》卷上，謂此銀山又名橫山，即《晉書》林邑王范文所求以爲國界者。其言蓋是。此山脈西接南北縱貫之安南山脈。安南山脈在此地段，聯珠高峯多在二〇〇〇公尺以上，有至二二八六公尺者，故此東西橫列之山脈，爲南北天然界限。檢今圖，越南河靜縣與廣平縣正以此山脈爲分界線，蓋亦唐與林邑國之國界也。《中國歷史地圖集》·〈唐代嶺南道西部圖〉，即繪唐代南疆於 N18°線上，甚爲正確；惟不知僅據唐代志書驩州南至羅伏郡界、林邑國界之里距約略繪之，抑別有詳證也。

唐代盛時正州領土疆界圖

